



La Kammerphilharmonie en acziun, ella sala Jugendstil dil Hotel dil Parc.

FOTO AUGUSTIN BEELI

## Tensiun e nostalgia, cumbats cun filarmonia

L'jamna vargada ha la Kammerphilharmonie Grischun entschiet sia turnea cul program «Winnetou: Der Schatz im Silbersee». Sunter la premiera a Bravuogn ha gl'orchester sunau a Flem, Savognin, Sogn Murezi ed ier sera a Cuera. Gl'auditori ha astgau guder tun ed acziun.

AUGUSTIN BEELI/FMR

Tgi seregorda buca dil peglia-tschittas che zappitschava cun sia reit tras tuttas battagliais, tras fronts da bandits ed indians. Ella pli davosa scena ha il niebel lord Castlepool la finala saviu pigliar il «Papilio polymnestor parinda», la raritad che muncava en sia collecziun. El film ha il perscrutader ina rolla secundara. Medemamein Sam Hawkins, igl um che purtava ina perucca suenter ch'els indians havevan scalpau el. Herox ei Winnetou, il cau dils Apaches, e siu frar da saun Old Shatterhand. Els gidan Fred Engel, il giuven che vul far vendetga perquei che bandits han mazzau siu bab ed engulau la mesadad d'in plan che muossa la via tiel lag misterius.

### Ir a kino senza mascrina

Colonel Brinkley e sia banda han mo ina finamira: anflar per tut prezi quei scazi. Els mazzan ed attaccan, Brinkley ei il schef-bandit, la carugna. Ella sala gronda dil hotel dil Parc a Flem han rodond 80

persunas vuliu veser puspei inagada «Der Schatz im Silbersee». Igl ei buca stau ina usitada sera da kino. Igl gi avon a Bravuogn ha gl'auditori aunc stuiu entrar el-la sala dil hotel Kurhaus cun mascrina. Il gi suenter a Flem lu la gronda midada: Igl ei stau in bi e bien sentiment da puspei saver ir a kino senza mesiras da Covid-19.

Atgnamein ei buca il film, mobein sia musica stada el center. La Kammerphilharmonie Grischun ha sunau live la musica legendar da quei film d'aventura. Il giuven dirigent hospitont *Laurent Zufferey* (mira scaffa) ha dirigiu la formaziun da 30 musicistas e musicists. La percussiu ha giu ina rolla purtonta, paucas e trumpettas medemamein tier scenas da pievel e l'attacca dramatica sil vitg fortificau cun palissadas. La suna da bucca ha il contrabassist Christian Hamann sunau live, ils schumbers Maurin Fritz e Richi Just. Scenas dramaticas cun bia gliued e cavals han Peter Schneider e Maya Rehm accentuau culs corns. Ella scena da sault el saloon ha Vera Schocher-Fritz schau resunar la ghitarra electronica.

### Musica ha accentuau tensiun

«Els onns siatonta havein nus mirau quels films da Winnetou el Kino Darms a Glion. Nus eran tut narrs da quels. Nos geniturs fagevan adina taxi», ha in um dall'annada 1964 raquintau ella pausa. Igl ei la generaziun ch'ei carschida si culs films da Winnetou ed Old Shatterhand. Gl'emprem, «Der Schatz im Silbersee», ei cumpariu 1962, tochen 1968 diesch ulteriurs. Pierre Brice, Lex Barker, Götz George sco bandit, Mario Adorf, Marie Versini ein vegni famus tras lur rollas en quels films. Las generaziuns avon haveva legiu ils cudischs da Karl May. Quei scribent tudestg vala sco in dils gronds dalla belletristica d'aventuras. Sia atgna biografia ei fetg speciala. Ins sa strusch creh ch'el ha scret schi bia d'indians, cowboys ed d'aventuriers orientals senza esser staus en quellas tiaras.

Malgrad ch'ins sa che l'aventura «Der Schatz im Silbersee» peglia ina buna fin, han ins sentiu ella sala floreala dil hotel dil Parc la tensiun. En enquala scena han ins era stuiu rir e surrir da cor. La Kam-

merphilharmonie Grischun ha accentuau quella tensiun culla musica accumpignonta. All'entschatta, lu denteren, ed

alla fin han ins udiu la melodia empalonta. La musica dil film da Martin Böttcher (1927-2019) ei ell'ureglia a biars.

### Il giuven dirigent hospitont

*Laurent Zufferey* ei naschius 1993 e carschius si a Sion. Siu talent ha el mussau baul sco percussiuist, el ha era gudi-gnau emprems premis als festivals a Verbier e Gstaad. Gl'onn 2017 ha el terminau siu studi a Manchester (GB) cul Master of Music in Performance. Ses promoturs ein stai denter auter *Pavvi Järvi*, *Vasily Petrenko*, *Mark Heron*. El ha dirigiu ell'Engeltiara il BBC Philharmonic Orchestra ed il Royal Liverpool Philharmonic Orchestra, plinavon ha el luvrau ella Norvegia, en Frontscha, Tiaratudestga e Tschechia cun orchesters. En Svizra cooperescha el en in project el KKL a Lucerna cugl Orchester sinfonico da giuvenils, la Camerata Svizra e la Sinfonietta Losanna.

Il matg 2022 daventa el dirigent assistent dalla Sinfonietta Basilea. La collaboraziun culla Kammerphilharmonie dil Grischun ha el entschiet avon dus onns. Dapi 30 onns dat ei el Grischun in orchester professional aschi variot sco il cantun sez. La musica dalla Kammerphilharmonie Grischun aud'ins buca mo a Cuera, mobein era ellas valadas, sin piazzas communalas, en baselgias ed en locals da sault, cun programs per pign e grond. Musica da combra, musica da film, concerts per famiglias ed il project «Side by Side» cun musicistas e musicists laics cumplettescha la multifariadad. Dapi 2016 meina il dirigent *Philippe Bach* la formaziun rappresentativa grischuna.

## Percuors olimpic a Vrin

L'Uniu da giuventetgna da Vrin ha envidau sonda la populaziun alla cuorsa da scursalar. Jester e dumiesti han gudiu l'occurrenza da bun'aura d'unviern.

AUGUSTIN BEELI/FMR

La partenza ei stada sur Prau Miscuns, sin rodond 1585 m.s.m., l'arrivada 200 meters d'altezia pli engiu. Els organisaturs han mesirau il temps sin 1475 m.s.m., sur il hotel Péz Terri, all'entschatta dalla via che meina sils mises ed encunter l'Alp Dado. L'Uniu da giuventetgna da Vrin ha organisau la cuorsa da scursalar, participontas e participonts han giu d'absolver la distanza dad in kilometer. La partenza ei stada la sonda allas 11.00. Ni sutgeras ni scarsolas a motor han denton menau sil liug da partenza. Tuts participonts, pign e grond, han stuiu trer ed ir siadora sez cun scarsolas e bobs. Negin problem eis ei stau, quei pign sforz s'audi tiel gudiement, han plirs participonts confirmau. Gest ad uras ei la brentina dalla damaun sesligiada ed il sulegl ha entschiet a cuchegiar ord ils niebels.

### Il team pli spectacular

La cuntrada da Vrin ei stada zugliada en ina fina cozza da neiv frestga. Gest quella ha fatg empau fastedis als preparaders dalla pista. La sera avon havevan els aunc smaccu il tschancun, tut fuss stau semtgau perfetg. Suenter mesanotg ha ei bischou, la temperatura ei denton buca curdada, anzi, ei ida dus grads ensi. Aschia

ei la pista da cuorsa stada empau loma. Ei ha pariu ch'els emprems alla partenza hagian in lev disavantatg. *Levin Caviezel*, il buob ch'ei partius culla numra 2, ha relativau quei. El ha buca gudignau, ei denton daventau 10avel da 24 rangai ch'ei parti singuls ni en gruppa ella categoria dils affons.

Era siat carschi han ughegiu da semetter en concorrenza culla scarsola ni cul bob. In team singular ein *Julia Caminada* e Shaarj stai. La dunna da Vrin Dado e siu tgaun han dumignau la distanza cun in temps da 3.56.36 minutas. Ina prestaziun gnanc schi mala, il quart plaz, da siat. Avon treis jamnas seigi la pista stada in bionton meglia e pli sperta, ha Julia Caminada manegiau. Mo era quella gada, alla cuorsa olimpica da Vrin, ha l'equipa pli speciala da tuttas gudiu la scursalada. Quell'occurrenza hagi ina liunga tradiziun a Vrin, els sappien gnanc cu ins hagi entschiet ad organisar ella, ha la presidenta dall'Uniu da giuventetgna, *Selina Alig*, getg alla FMR. En scadin cass era la cuorsa cumbinada culla sera famigliara. La rangaziun era integrada el program dalla sentupada hilarica il meins da fevrer. La pandemia ha impedi uonn da porcher la sera famigliara, denton buca la cuorsa da scursalar. Els pli sperts, *Mattia* e *Ramo-*

*na Derungs*, en stai giu en strusch treis minutas, per la distanza d'in kilometers han els duvrau exact 2.55.58 minutas. Uonn ein per l'emprema gada era hosps da vacanzas s'annunziat per la cuorsa da scursalar dall'Uniu da giuventetgna da Vrin.

### Rangaziun

#### Categoria affons, singuls e gruppa

1. Derungs Mattia e Ramona, 2.55.58; 2. Derungs Nico, 3.08.26; 3. Buchzik Moritz e Bertram, 3.09.24; 4. Derungs Gianin, 3.15.96; 5. Heule Iva e Nick, 3.55.77; 6. Caviezel Olivia, 4.16.10; 7. Zuberbühler Enno, 4.16.93; 8. Capaul Nino, 4.28.76; 9. Zuberbühler Hannes e Daniel, 4.30.21; 10. Caviezel Levin, 4.34.10; 11. Caminada Svenja, 4.38.20; 12. Niebaum Ryan, 5.02.10; 13. Caminada Bianca e Paulin, 5.09.45; 14. Caviezel Noelia e Rina, 5.10.13; 15. Zuberbühler Mila e Mengia, 5.19.46; 16. Caviezel Mattiu, 5.20.10; 17. Heule Pedro ed Ole, 5.43.77; 18. Bearth Elia, Jona ed Andrea, 5.55.57; 19. Caminada Rilana e Sgier Ilenia, 5.58.13; 20. Heule Noemi e Christof, 6.00.54; 21. Abud Adamez Victoria e Violetta, 6.35.71; 22. Zuberbühler Tilda, Norik e Nelly, 6.35.97; 23. Caminada Alina, 7.00.79; 24. Abud Adamez Nuria, 7.19.20.

#### Categoria carschi

1. Caminada Rino, 2.59.12; 2. Alig Irena, 3.25.26; 3. Alig Gion Ursin, 3.40.31; 4. Caminada Julia e tgaun Shaarj, 3.56.36; 5. Caviezel Armin, 4.06.14; 6. Caminada Jana, 5.12.98; 7. Alig Andriu, 6.53.09.

Fotografias dalla cuorsa anfleis vus sin pagina 11

### MUSTÉR

#### Gie pil concept da bikes

Venderdis ei stada ella halla Cons l'endischavla seduta dil cussegl da vischnaunca da Mustér per la perioda d'uffeci 2021-2024. El center ei stau il concept communal davart sendas per velos da muntogna. Il cussegl ha approbau il concept da bike e concediu persunter in credit da 475 000 francs. Il concept preveda da realisar differentas sendas da bike. Sper entgins projects locals (sanzuons dils trasses ni construcziuns novas) vegn il project regiunal da bike sut il tetg da Project San Gottardo persequitau vnavon e realisau. Pil concept communal da bike ei vegniu concediu unanimamein il credit tochen 2024. Il conclus vegn sut-tamess el senn digl art. 21. lit. c dalla constituziun communal a referendun facultativ.

Plinavon ha il cussegl da vischnaunca approbau la revisiun parziala dils statuts dil Register funsil Cadi. Cullas midadas dil dretg cantunal dils davos onns, e demai che la vischnaunca da Breil ei associada al Register funsil da Glion, eis ei stau necessari d'actualisar quels.

Ultra da quei ha il cussegl priu enconuschientscha dil project «la pendent». Il president dall'uniu cul medem num, *Christian Lovetz*, ha presentau al cussegl il project che preveda da realisar la pli liunga punt pendent dil Grischun cun ina lunghezia da rodond 300 meters. Il project vegn a custar tenor preventiv 1,8 milliuns francs. Da quella summa duei vegnir rimnau 1,1 milliuns francs dall'interessenza privata. Il project duei vegnir realisau ils proxims dus onns. (cdm/fmr)

FMR FONDAZIUN  
| MEDIAS  
RUMANTSCHAS